

# Qalam

133, Safar 1381, August 1961, 60 Sen

## Tugas kita

Bagi seseorang Islam yang kuat imannya kepada Allah dan percaya kepada seruan Rasul-Nya *sallā Allāhu alayhi wa sallam* tentulah cukup mengetahui bahawa dengan sifatnya sebagai seorang Islam adalah ia mempunyai tanggungjawab kepada masyarakatnya.

Mereka tentunya cukup mengetahui bahawa yang dikehendaki dengan masyarakat itu adalah dimulai dari dirinya kepada anak isterinya, saudara-saudaranya, seisi rumah tangganya, kemudian kepada jirannya dan seterusnya kepada isi kampungnya, lalu kepada daerah di sekelilingnya dan seterusnya kepada negaranya.

Kepada mereka yang ditanggungkan, bukannya sahaja disuruh membantu dan bekerjasama di dalam menjalankan hukum-hukum Allah tetapi diperintahkan supaya yang tahu mengajar, dan yang tidak tahu belajar supaya masyarakatnya itu menjadi pandai - tidak buta mata hatinya. Orang-orang yang tidak mengendahkan dasar ini tentunya akan ditanya tanggungjawabnya di hadapan Tuhan. Dengan dasar ini zahir bahawa yang dikatakan agama Islam itu, bukan hanya semata-mata meliputi perkara-perkara ibadat sahaja tetapi adalah agama yang tidak dapat dipisahkan daripada pergelakan hidup di dunia. Hukum agama itu tidak dapat dipisahkan daripada kehidupan sehari-hari.

Rasulullah sendiri telah banyak memberi contoh teladan kepada umatnya supaya hidup di dalam masyarakat yang berbahagia dan tolong-menolong di dalam "menyeru kepada kebaikan

dan menegah daripada kejahanatan". Tidak ada termasuk di dalam ajaran Islam sesuatu yang menyeru umatnya membuat kejahanan tetapi ia menentang segala kejahanan.

Kalau ada tarbiah sesuatu kejahanan. Apalagi di dalam mengubah dasar-dasar Islam atau hukum-hukum Islam maka wajib bagi umat Islam menegah kejahanan itu. Kalau ia kuat dan cukup imannya serta berkesanggupan melaksanakannya maka diperintahkan kepadanya melawan kejahanan itu dengan tangannya (perbuatannya) dan sekiranya tidak sanggup dengan tangannya maka dengan lidahnya (perkataannya) dan sekiranya tidak sanggup dengan perkataannya dengan hatinya. Yang akhir ini adalah sedaif-daif iman seseorang melakukannya iaitu mereka-mereka yang tidak mempunyai sesuatu daya upaya.

Hal ini berlaku di dalam perbuatan kejahanan sehari-hari di dalam masyarakat rumah tangganya, di sekelilingnya dan seterusnya di dalam negaranya - dan yang dipandang daif ialah mereka-mereka yang tidak menyampaikan perasaannya - hanya menahannya di dalam hatinya sahaja. Ertinya orang yang tidak berupaya menghalang atau mencela sesuatu perbuatan yang menekan atau yang bertentangan dengan hukum-hukum agama, adalah mereka orang yang sangat-sangat daif imannya.

Kalau kita baca sejarah Islam, semenjak daripada zaman Nabi hingga kepada zaman Khulafa' ar-Rasyidin sampai kepada zaman-zaman yang akhir ini banyak benar kita melihat mereka-mereka yang beriman, yang telah menderita hidupnya tatkala mereka dengan tegas mendirikan hak dan meruntuhkan kebatilan, mereka dengan berani mendirikan hak Allah sekalipun jiwanya melayang.

Ini yang tidak lain kerana mencontoh daripada ketegasan Nabi dalam melaksanakan tugas sehingga apabila keluarga baginda Rasulullah meminta supaya memberhentikan menyeru yang hak, baginda Rasulullah dengan tegas menyatakan bahawa baginda tidak akan memberhentikan seruan itu sekalipun baginda hancur atau binasa.

Di dalam dasar inilah dipandang oleh orang-orang

yang beriman bahawa kepada tiap-tiap seseorang terletak tugas mendirikan hak dan berusaha meruntuhkan kebatilan.

Sebab itulah seseorang yang mengutamakan dirinya sahaja – tidak mau bekerjasama dan bersama-sama untuk mendirikan yang hak dan tidak mau berusaha meruntuhkan yang batil – sudah tentu kelak mereka ditanya tanggungjawabnya di hadapan Allah. Pertanyaan ini bukan hanya ditanya kepada pemimpin-pemimpin tetapi kepada tiap-tiap seorang daripada mereka itu.

Apabila umat Islam menyempurnakan dasar ini maka baharulah mereka menjadi suatu umat yang baik dan sempurna hidupnya seperti firman Allah:

*kuntum khaira ummatin ukhrijat li an-naasi ta'murūna*

*bi-al-ma'rūfi wa tanhawna 'ani al-munkari wa-tu'minūna bi-Allāh.-*

(*Alī 'Imrān*, 110)

Maksudnya: Adalah kamu sebaik-baik umat yang dijadikan yang menyeru kepada yang ma'ruf (kebaikan) dan menegah daripada munkar (kejahanatan) dan kamu adalah percaya kepada Allah.

Marilah kita menjadikan diri kita umat yang baik dan kuat imannya iaitu dengan sedaya upaya berbuat kebaikan dan menegah kejahanatan (mungkar) sebolehnya dengan tenaga dan lisan kerana itulah asas yang sebaik-baiknya. Sedang kalau kemungkaran itu hanya kita tegur dengan hati maka adalah ia menjadikan kita orang yang sedaif-daifnya beriman.



*Suatu pemandangan dalam majlis jamuan negara yang diadakan oleh kerajaan Brunei dalam masa lawatan Duli Yang Maha Mulia Seri Paduka Baginda Yang di-Pertuan Agong dan Permaisuri Agong ke Brunei pada bulan Julai yang lalu. Gambar menunjukkan baginda sedang bertitah membalauc ucapan Yang Teramat Mulia Pengiran Pemanja<sup>1</sup> (yang mengalu-alukan baginda bagi pihak kerajaan Brunei).*

<sup>1</sup> Ejaan sebenar ialah Pengiran Pemancha